

Аурика Луковкина

# Самые популярные МОЛИТВЫ



Аурика Луковкина

**Самые популярные молитвы**

«Научная книга»

2013

**Луковкина А.**

Самые популярные молитвы / А. Луковкина — «Научная книга»,  
2013

Обращая свой ум и душу со святым молитвенным словом к Всевышнему, Пречистой Богородице или святым угодникам Божиим, мы просим у них о здоровье. Искреннее раскаяние, с упованием на милосердие всепрощающего Господа, и искупление – молитвой, постом, добром к своим ближним. Святое Крещение, исповедь, Святое Причастие – все эти средства для сохранения духовного и физического здоровья даровал человеку Господь, и первым шагом на этом пути к обретению истинного здоровья становится святая молитва.

© Луковкина А., 2013  
© Научная книга, 2013

## Содержание

Часть I	5
Глава 1	5
Молитвы ко Господу	5
Молитвы ко Пресвятой Богородице	6
Молитвы ко Святым	7
Глава 2	10
Молитвы ко Святым	10
Глава 3	11
Молитвы ко Святым	11
Глава 4	12
Молитвы ко Святым	12
Глава 5	13
Молитвы ко Пресвятой Богородице	13
Молитвы ко Святым	13
Конец ознакомительного фрагмента.	16

# **Аурика Луковкина**

## **Самые популярные молитвы**

### **Часть I**

#### **Молитвы об исцелении от болезней**

#### **Глава 1**

##### **Молитвы о скорейшем выздоровлении от разных недугов**

###### **Молитвы ко Господу**

###### **Молитва**

Владыко Христе Боже, Иже страстьми Своими страсти моя исцеливый и язвами Своими язвы моя уврачевавый, даруй мне, много Тебе прегрешившему, слезы умиления; страствори моему телу от обоняния Животворящаго Тела Твоего, и наслади душу мою Твоею Честною Кровию от горести, еюже мя сопротивник напои: возвыси мой ум к Тебе, долу поникший, и возведи от пропасти погибели: яко не имам покаяния, не имам умиления, не имам слезы утешительныя, возводящая чада ко своему наследию. Омрачихся умом в житейских страстех, не могу воззрети к Тебе в болезни, не могу согреться слезами, яже к Тебе любви. Но, Владыко Господи Иисусе Христе, сокровище благих, даруй мне покаяние всецелое и сердце люботрудное во взыскание Твое, даруй мне благодать Твою и обнови во мне зраки Твоего образа. Оставих Тя, не остави мене; изыди на взыскание мое, возведи к пажити Твоей и сопричти мя овцам избраннаго Твоего стада, воспитай мя с ними от злака Божественных Твоих Таинств, молитвами Пречистыя Твоея Матере и всех святых Твоих. Аминь.

###### **Молитва**

Боже сильный, милостию строяй вся на спасение роду человеческому, посети раба Своего сего (*имя*) нарицающа имя Христа Твоего, исцели его от всякого недуга плотскаго: и отпусти грех и греховныя соблазны, и всяку напасть, и всяко нашествие неприязнено далече, сотвори от раба Твоего. И воздвигни от одра греховнаго, и устрой его во святую Твою Церковь здрава душою и телом, и дела добрыми славящаго со всеми людьми имя Христа Твоего, яко Тебе славу возсылаем, со Безначальным Ти Сыном и со Святым Духом, ныне и присно и во веки веков. Аминь.

###### **Молитва об исцелении болящего**

Владыко, Вседержителю, святой Царю, наказуй и не умерщвляй, утверждая низпадающия и возводя низверженныя, телесныя человеков скорби исправляй, молимся Тебе, Боже наш, раба Твоего (*имя*) немощствующа посети милостию Твоею, прости ему всякое согрешение вольное и невольное. Ей, Господи, врачебную Твою силу с небесе низпосли, прикоснися

телеси, угаси огневицу, укроти страсть и всякую немощь таяющуюся, буди врач раба Твоего (имя) воздвигни его от одра болезненного и от ложа озлобления цела и всесовершенна, даруй его Церкви Твоей благоугождающа и творяща волю Твою. Твое бо есть, еже миловати и спасати ны, Боже наш, и Тебе славу возсылаем, Отцу и Сыну и Святому Духу, ныне и присно и во веки веков. Аминь.

### **Молитва об исцелении от болезней**

*Тропарь, глас 4*

Скорый в заступлении един сый, Христе, скорое свыше покажи посещение страждущему рабу Твоему, и избави от недуг и горьких болезней, и воздвигни во еже пети Тя и славити непрестанно, молитвами Богородицы, едина Человеколюбче.

*Кондак, глас 2*

На одре болезни лежащего и смертною раною уязвленного, якоже иногда воздвигл еси, Спасе, Петрову тещу и разслабленного на одре носимаго; сице и ныне, Милосерде, страждущаго посети и исцели: Ты бо един еси недуги и болезни рода нашего понесый, и вся могый, яко Многомилостив.

### **Молитва в болезни**

Господи, Боже мой, Владыко жизни моей, Ты по благодати своей сказал: не хочу смерти грешника, но чтоб он обратился и жив был. Я знаю, что эта болезнь, которою я страдаю, есть наказание Твое за грехи мои и беззакония, знаю, что по делам моим я заслужил тяжчайшее наказание, но, Человеколюбче, поступай со мной не по злобе моей, а по беспредельному милосердию Твоему. Не пожелай смерти моей, но дай мне силы, чтобы я терпеливо сносил болезни, как заслуженное мною испытание, и по исцелении от нее обратился всем сердцем, всею душою, всеми моими чувствами к Тебе, Господу Богу, Создателю моему, и жив был бы для исполнения святых Твоих заповедей, для спокойствия моих родных и для моего благополучия. Аминь.

## **Молитвы ко Пресвятой Богородице**

### **Пресвятой Богородице перед Ее иконой «Всех скорбящих Радость»**

О, Пресвятая Владычице Богородице, Преподобная Мати Христа Бога Спасителя нашего, всех скорбящих радости, больных посещение, немощных покрове и заступнице, вдовиц и сирых покровительнице, матерей печальных всенадежная утешительнице, младенцев немощных крепосте, и всем беспомощным всегда готовая помощь и верное прибежище! Тебе, о, Всемиловитая, дадеся от Всевышняго благодать во еже всех заступати и избавляти от скорби и болезней, зане Сама лютыя скорби и болезни претерпела еси, взираючи на вольное страдание Сына Твоего возлюбленного и Того на кресте распинаема зрящи, егда оружие Симеоном предначертанное сердце Твое пройде. Темже убо, о Мати чадолюбивая, воими гласу моления нашего, утеши нас в скорби сущих, яко верная радости Ходатаица: предстоящи престолу Пресвятыя Троицы, одесную Сына Твоего, Христа Бога нашего, можеша, аще восхощеши, вся нам полезная испросити. Сего ради с верою сердечною и любовию от души припадаем к Тебе яко Царице и Владычице, и псаломски вопити Тебе дерзаем: слыши, дщи, и виждь, и приклони ухо Твое, услыши моление наше, и избави нас от обстоящих бед и скорбей: Ты бо прошения всех верных, яко скорбящих радость, исполняеши, и душам их мир и

утешение подаеши. Се зриши беду нашу и скорбь: яви нам милость Твою, последи утешение уязвленному печалию сердцу нашему, покажи и удиви на нас грешных богатство милосердия Твоего, подаждь нам слезы покаяния ко очищению грехов наших и утолению гнева Божия, да с чистым сердцем, совестию благою и надеждою несумненною прибегаем ко Твоему ходатайству и заступлению: приими, всемилостивая наша Владычице Богородице, усердное моление наше Тебе приносимое, и не отрини нас недостойных от Твоего благосердия, но подаждь нам избавление от скорби и болезни, защити нас от всякого навета вражия и клеветы человеческия, буди нам помощница неотступная во все дни жизни нашея, яко да под Твоим матерним покровом всегда пребудем цели и сохранени Твоим заступлением и молитвами к Сыну Твоему и Богу Спасителю нашему, Ему же подобает всякая слава, честь и поклонение, со безначальным Его Отцем и Святым Духом, ныне и присно и во веки веков. Аминь.

## **Молитвы ко Святым**

### **О Тяжко Болящих Преподобному Афанасию Афонскому**

Преподобный отче Афанасие, изрядный угодниче Христов и великий Афонский чудотворче! Во дни земного жития твоего многия на путь правый наставивый и в Царствие Небесное мудре руководивый, скорбныя утешивый, падающим подавый руку помощи и во всем любезен, милостив и сострадателен отец бывый, ты ныне, в Небесной пребывая светлости, наипаче умножаеши любовь твою к нам, немощным, в море житейском различне бедствующим, искушаемым духом злобы и страстями своими, воюющими на дух. Сего ради смиренно молим тя, святой отче: по данной тебе от Бога благодати помози нам творити волю Господню в простоте сердца и смирении, искушения же вражии победити и свирепое страстей море изсушити, да тако немокрено преидем житейскую пучину и предстательством твоим ко Господу сподобимся достигнути обетованного нам Царствия Небеснаго, славяще Безначальную Троицу, Отца и Сына и Святаго Духа, ныне и присно и во веки веков. Аминь.

### **Чин келейного молебствия святым, имеющим особую благодать помогать в различных болезнях и нуждах**

Молитв ради Пречистыя Твоя Матере и всех святых Твоих, Господи Иисусе Христе Боже наш, помилуй нас. Аминь.

Слава Тебе, Боже наш, слава Тебе.

Царю Небесный... Трисвятое. Пресвятая Троице... Отче наш... Господи, помилуй. (12 раз)

Приидите, поклонимся... (Трижды)

И псалом 50.

#### *Псалом 19*

Услышит тя Господь в день печали, защитит тя имя Бога Иаковля. Послет ти помощь от Святаго и от Сиона заступит тя. Помянет всяку жертву твою, и всесожжение твое тучно буди. Даст ти Господь по сердцу твоему и весь совет твой исполнит. Возрадуемся о спасении твоём и во имя Господа Бога нашего возвеличимся. Исполнит Господь вся прошения твоя. Ныне познах, яко спасе Господь христа Своего, услышит Его с Небесе Святаго Своего, в силах спасение десницы Его. Сии на колесницах, и сии на конех, мы же во имя Господа Бога нашего

призовем. Тии спяти быша и падоша, мы же востахом и исправихомся. Господи, спаси царя и услыши ны, воньже аще день призовем Тя.

*Псалом 41*

Имже образом желает елень на источники водныя, сице желает душа моя к Тебе, Боже. Возжажда душа моя к Богу Крепкому, Живому: когда прииду и явлюся лицу Божию? Быша слезы моя мне хлеб день и ночь, внемда глаголатися мне на всяк день: где есть Бог твой? Сия помянух и излиях на мя душу мою, яко пройду в место селения дивна, даже до дому Божия, во гласе радования и исповедания шума празднующаго. Вскую прискорбна еси, душе моя? И вскую смущаеши мя? Уповай на Бога, яко исповемся Ему, спасение лица моего и Бог мой. Ко мне самому душа моя смятется: сего ради помянух Тя от земли Иордански и Ермониимски, от горы малыя. Бездна бездну призывает во гласе хлябий Твоих, вся высоты Твоя и волны Твоя на мне преидоша.

В день заповесть Господь милость Свою, и нощию песнь Его от мене, молитва Богу живота моего. Реку Богу: Заступник мой еси, почто мя забыл еси? И вскую сетую хожду, внемда оскорбляет враг? Внемда сокрушатися костем моим, поношаху ми врази мои, внемда глаголати им мне на всяк день: где есть Бог твой? Вскую прискорбна еси, душе моя? И вскую смущаеши мя? Уповай на Бога, яко исповемся Ему, спасение лица моего, и Бог мой.

По сих пение: Слава Тебе, Боже наш, слава Тебе.

Пресвятая Богородице, спаси нас.

Святой (*ему же хочещи молитися, называя полное имя его*) моли Бога о мне грешнем (грешной).

*Тропарь святого, ему же хочещи молитися*

Слава Отцу и Сыну и Святому Духу, и ныне и присно и во веки веков. Аминь.

*Кондак. Величание. Евангелие. Молитва ко святому тому же*

Аще не обретается тропарь и кондак святому, поем тропари и кондаки общие святым. Аще не обретается молитва ко святому, поем предложенную стихирю, аще и ея нет, довольствуемся и тем, поем паки.

Слава Тебе, Боже наш, слава Тебе.

Пресвятая Богородице, спаси нас.

Святой (*ему же хочещи молитися*) моли Бога о нас.

*В конец молебствия, благодаряще Бога, поем*

## **Песнь хвалебную Пресвятой Богородице**

Тебе, Матерь Божию, хвалим;  
Тя, Марие, Деву Богородицу, исповедуем;  
Тя, пречестнаго Отца Дщерь, вся земля величает.  
Тебе вси ангели и архангели и вся начала смиренно служат;  
Тебе вся власти, престолы, господствия и вся превышния силы  
небесныя повинуются.  
Тебе херувими и серафими радующеся предстоят и непрестанным  
гласом вопиют:  
Святая Богородице Мати, полны суть небеса и земля величества  
славы плода чрева Твоего.

Тебе преславный апостольский лик своего Творца Матерь  
восхваляет;  
Тебе мучеников множество Богородицу величает;  
Тебе преславный исповедников сонм Бога Слова храм нарицает;  
Тебе господствени полцы всего девства образ проповедают;  
Тебе вся небесная воинства Царицу Небесную восхваляют.  
Тебе по всей вселенной Церковь святая прославляет, Матерь  
Божью почитаючи;  
Тя истиннаго Царя небеснаго Отроковицу превозносит.  
Ты еси ангелом Госпожа, Ты еси райская дверь,  
Ты лестница Царствия Небеснаго,  
Ты Царя славы чертог,  
Ты ковчег благочестия и благодати,  
Ты еси бездна щедрот,  
Ты еси прибежище грешных.  
Ты Мати Спасителя,  
Ты освобождения ради пленнаго человека, Бога восприяла еси во  
чреве.  
Тобою поправ бысть враг;  
Ты отверзла еси верным двери Царствия Небеснаго.  
Ты одесную Бога стоиши;  
Ты Бога за нас молиши, Дево Марие. Иже будет судити живым и  
мертвым.  
Тя убо просим, Заступницу пред Сыном Твоим и Богом, иже  
кровию Своею нас искупи, да мзду восприимем в вечной славе.  
Спаси люди Твоя, Богородице, и благослови достояние Твое, яко  
да будем причастницы наследия Твоего;  
Упаси и соблюди нас даже до века.  
На всяк день, о Пресвятая, хвалити и ублажати Тя желаем сердцем  
и устнами. Сподоби, Премилосердая Мати, ныне и всегда от греха  
сохранитися нам;  
Помилуй нас, Заступнице, помилуй нас.  
Буди милость Твоя на нас, якоже на Тя уповахом во веки. Аминь.

*По сих возложи все свои печали на Господа Бога и Его угодников и пребуди в несумненной надежде на Его неизреченную милость.*

Все святые – угодники Божии, прославляя которых Господь творит любые чудеса по молитвам, к ним обращенным. Однако в народе было замечено, что чаще всего люди исцеляются от тех или иных недугов, молясь определенным святым. Эти наблюдения мы ниже и приводим.

## **Глава 2**

### **Молитвы при грыже**

#### **Молитвы ко Святым**

##### **Великомученику Артемию**

*Тропарь, глас 4*

Истинною бо Христовою верою утверждься, страстотерпче, мучителя злочестива царя, победил еси со идольским того возношением. Тем от Царя Великаго, вечно царствующаго, пресветлым венцем победным одарен бысть, вся исцеляяй болящия и призывающая тя, Артемие великий, моли Христа Бога спасти души наша.

*Кондак, глас 2*

Благочестиваго и венценоснаго мученика, на враги победы взявшаго одоление, сошедшеся, достойно песньми восхвалим Артемия, превеликаго в мученицех, чудес же дателя пребогатаго, молиться бо Господу о всех нас.

## **Глава 3**

### **Молитвы от болезней чревных**

#### **Молитвы ко Святым**

##### **Преподобному Серафиму, Саровскому чудотворцу**

О, пречудный отче Серафиме, великий Саровский чудотворче, всем прибегающим к тебе скоропослушный помощник! Во дни земного жития твоего никтоже от тебе тощ и неутешен отыде, но всем в сладость бысть видение лика твоего и благоуветливый глас словес твоих. К сим же дар исцелений, дар прозрения, дар немощных душ врачевания, обилен в тебе явися. Егда же призва тя Бог от земных трудов к небесному успокоению, николиже любовь твоя преста от нас, и невозможно есть исчислити чудеса твоя умножившаяся, яко звезды небесныя: се бо по всем концем земли нашае людем Божиим являешия и даруеши им исцеления. Темже и мы вопием ти: о претихий и кроткий угодник Божий, дерзновенный к Нему молитвенник, николиже призывающийя твоя отрваяя, вознеси о нас благомошную твою молитву ко Господу сил, да дарует нам вся благопотребная в жизни сей и вся к душевному спасению полезная, да оградит нас от падений греховных и истинному покаянию научит нас, во еже безпреткновенно внити нам в вечное небесное царство, идеже ты ныне в незаходимей сияеши славе, и тамо воспевати со всеми святыми живоначальную Троицу до скончания века.

Аминь.

## **Глава 4**

### **Молитвы при нарывах**

#### **Молитвы ко Святым**

##### **Бессребреникам и мученикам Киру и Иоанну**

*Тропарь, глас 5*

Святии славнии Кире и Иоанне, безсребреницы, мученицы и чудотворцы, милосердием своим, яко стеною неодолимою, нас оградите от всех бед и от врагов видимых и невидимых сохраните непрестанною вашею молитвою ко Господу.

*Кондак, глас 3*

От Божественныя благодати дар чудес приемши, святии, чудодействуете непрестанно, вся наша страсти рукодейством секуще невидимым, Кире Богомудре со Иоанном славным: вы бо Божественнии врачеве есте.

## **Глава 5**

### **Молитвы при болезнях глаз**

#### **Молитвы ко Пресвятой Богородице**

##### **Пресвятой Богородице перед ее иконой «Казанская»**

О, Пресвятая Госпоже, Владычице Богородице! Со страхом, верою и любовью припадающе пред честною и чудотворною иконою Твоею, молим Тя: не отврати лица Твоего от прибегающих к Тебе, умоли, милосердая Мати, Сына Твоего и Бога нашего, Господа Иисуса Христа, да сохранит мирну страну нашу, Церковь же Свою святую непоколебиму да соблюдет, и от неверия, ересей и раскола да избавит. Не имамы бо иныя помощи, не имамы иныя надежды, разве Тебе, Пречистая Дево: Ты еси всесильная христиан Помощница и Заступница: избави же и всех, с верою Тебе молящихся, от падений греховных, от навета злых человек, от всяких искушений, скорбей, болезней, бед и от внезапной смерти: даруй нам дух сокрушения, смирение сердца, чистоту помышлений, исправление греховныя жизни и оставление прегрешений, да вси, благодарне воспевающе величия и милости Твоя, являемая над нами zde на земли сподобимся и Небеснаго Царствия, и тамо со всеми святыми прославим пречестное и великолепное имя Отца и Сына и Святаго Духа во веки веков. Аминь.

#### **Молитвы ко Святым**

##### **Святому мученику архидиакону Лаврентию**

О, пресвятыи и предивныи страстотерпче Христов архидиаконе Лаврентие! Восхваляюще веру и страдания твоя, почитаем победу и венценосное прехожждение твое чрез горящее углище от тьмы века сего ко свету не вечернему престола величества Божия, темже убо молим тя: якоже древле притекавша с верою к покрову твоему чудеса твоими утвердил еси, тако да приимиши и нас под кров твой, и в болезни и печалех наших заступник нам да будеши: и якоже от слепоты телесных очес Крискентиана преложением рук исцелил еси, тако да исцелиши предстательством твоим у престола Божия и нашу душевную слепоту; призри на расслабление наше телесное и душевное, и укрепи нас бодренностию противу враг наших видимых и невидимых, удрочающих нас напастьми. Да твоею помощию путь маловременныя жизни сея прешедше, непобеждени от бед и скорбей и всякаго лютаго обстояния, достигнем неприступныя славы величества Божия, идеже предстоя, молишися со дерзновением за люди прибегающия с верою к тебе и воспевающия дивнаго во святых Бога Израилева во веки веков. Аминь.

##### **Святому великомученику и целителю Пантелеимону**

О, святыи великомучениче и целителю Пантелеимоне, Бога милостиваго подражателю! Призри благосердием и услыши нас грешных, пред святою твоею иконою усердне молящихся, испроси нам у Господа Бога, Емуже со ангелы предстоиши на небеси, оставление грехов и прегрешений наших: исцели болезни душевныя и телесныя рабов Божиих ныне поминаемых, zde предстоящих и всех христиан православных, ко твоему заступлению притекающих: се бо, грех

наших ради, люте одержими есмы многими недуги и не имамы помощи и утешения: к тебе же прибегаем, яко дадеся ти благодать молиться за ны и целити всяк недуг и всяку болезнь: даруй убо всем нам святыми молитвами твоими здравие и благомощие души и тела, преуспевание веры и благочестия и вся к житию временному и ко спасению потребная, яко да сподобившися тобою великих и богатых милостей, прославим тя и Подателя всех благ, дивнаго во святых Бога нашего, Отца и Сына и Святаго Духа, во веки веков. Аминь.

### **Ему же молитва вторая, наедине от лица болящего читаемая**

О, великий угодниче Христов, страстотерпче и врачу многомилостивый, Пантелеимоне! Умилосердися надо мною грешным рабом, услыши стенание и вопль мой, умилостиви Небеснаго, Верховнаго Врача душ и телес наших, Христа Бога нашего, да дарует ми исцеление от недуга, мя гнетущаго. Приими недостойное моление грешнейшаго паче всех человек, посети мя благодатным посещением, не возгнушайся греховных язв моих, помажи твоя елеем милости твоея и исцели мя; да здрав сый душею и телом, остаток дней моих, благодатию Божиею, возмогу провести в покаянии и угождении Богу и сподоблюся восприять благий конец жития моего. Ей, угодниче Божий! Умоли Христа Бога, да предстательством твоим дарует здравие телу моему и спасение души моей. Аминь.

### **Святителю Спиридону чудотворцу, епископу Тримифунтскому**

#### *Тропарь, глас 1*

Собора Перваго показался еси поборник и чудотворец, Богоносне Спиридоне, отче наш. Темже мертву ты во гробе возгласив, и змию в злато претворил еси: и внемгда пети тебе святая молитвы, Ангелы, сослужащая тебе, имел еси, священнейший. Слава Давшему тебе крепость, слава Венчавшему тя, слава Действующему тобою всем исцеления!

#### *Кондак, глас 2*

Любовию Христовою уязвився священнейший, ум вперив зарею Духа, детельным видением твоим деяние обрел еси, Богоприятне, жертвенник Божественный быв, прося всем Божественнаго сияния.

### **Молитва**

О, великий и пречудный святителю Христов и чудотворче Спиридоне, Керкирская похвало, всея вселенная светильниче пресветлый, теплый к Богу молитвенниче и всем, к тебе прибегающим и с верою молящимся, скоропредстательный заступниче! Ты веру православную на Никейстем Соборе посреде отцев преславно изъяснил еси, ты единство Святыя Троицы чудесною силою показал еси и еретиков до конца посрамил еси. Услыши нас грешных, святителю Христов, молящихся тебе, и сильным твоим предстательством у Господа избави нас от всякаго злаго обстояния: от глада, потопа, огня и смертоносных язв. Ты бо во временней жизни своей от всех сих бедствий избавлял еси людей твоих: от нашествия агарян и от глада страну твою сохранил еси, царя от неисцельнаго недуга избавил и многия грешники к покаянию привел еси, за святость же жития твоего Ангелы невидимо в церкви, поющая и сослужащая тебе, имел еси. Сице убо прослави тебе, вернаго Своего раба, Владыка Христос, яко вся тайная человеческая деяния дарова тебе разумети и обличати неправедно живущия. Многим, в скудости и недостаточестве живущим, ты усердно помогал еси, людей убогих изобильно во время глада напитал еси, и иная многая знамения силою в тебе живущаго Духа Божия сотворил

еси. Сице и нас не остави, святителю Христов, поминай нас, чад своих, у престола Вседержителя, и умоли Господа, да подаст многих наших грехов прощение, безбедное и мирное житие да дарует нам, кончины же живота непостыдныя и мирныя и блаженства вечнаго в будущем веце сподобит нас, да выну возсылаем славу и благодарение Отцу и Сыну и Святому Духу, ныне и присно и во веки веков. Аминь.

## **Конец ознакомительного фрагмента.**

Текст предоставлен ООО «ЛитРес».

Прочитайте эту книгу целиком, [купив полную легальную версию](#) на ЛитРес.

Безопасно оплатить книгу можно банковской картой Visa, MasterCard, Maestro, со счета мобильного телефона, с платежного терминала, в салоне МТС или Связной, через PayPal, WebMoney, Яндекс.Деньги, QIWI Кошелек, бонусными картами или другим удобным Вам способом.